

四庫全書薈要

• 乾隆御覽本

史部

十六國春秋卷九十一

西涼錄一

李嵩

李嵩字玄盛小字長生隴西成紀人也漢前將軍廣十
六世孫廣子侍中敢之後曾孫仲翔後漢初為將軍討
叛羌於素昌素昌乃狄道也衆寡不敌死之仲翔子伯
考奔喪因葬于狄道之東川因以家焉遂世為西州著

姓高祖雍曾祖柔仕晉並歷顯位雍至東莞太守柔至

相國從事中郎北地太守祖弇

音弇

仕前涼張軌為武衛

將軍天水太守封安世亭侯父昶字中堅幼有令譽為

世子侍講年十八卒昶昶之遺腹子也少而好學性沉

敏寬和美器度通涉經史尤善天文及長頗有聲稱兼

習武藝誦孫吳兵法嘗與呂光太史令郭璽及同母弟

宋繇同宿磨起謂繇曰君當位極人臣如李君者終當

有國土之分家有騶草馬生白額駒此其時也光龍飛

二年建康太守京兆段業叛光自稱涼州牧以燉煌太

守趙郡孟敏為沙州刺史署嵩為效穀令宋繇亦仕于

業為中散常侍孟敏卒燉煌護軍馮翊郭謙沙州治中

燉煌索仙等以嵩溫毅有惠政推為寧朔將軍燉煌太

守嵩初難之會宋繇自張掖告歸燉煌言於嵩曰段業

無經濟遠略終必無成兄忘郭麀之言耶白額駒今已

生矣嵩乃從之遣使請命於業業因以嵩為安西將軍

燉煌太守領護西胡校尉及業僭號涼王其右衛將軍

燉煌索嗣言於業曰李嵩不可使據燉煌恐此地非復
大王之有業乃以嗣代嵩為燉煌太守嗣率騎五百而
西未至二十里移檄使嵩迎已嵩驚疑將出迎之效穀
令張邈及宋繇止之曰呂氏政衰段氏闇弱正是英豪
有為之日將軍據有一國之成資奈何束手授人索嗣
自恃本郡謂人情附已不虞將軍猝能拒之可一戰而
擒也宋繇亦曰大丈夫已為世所推今日便授首於嗣
豈不為天下笑乎大兄英姿挺特有雄伯之風張王之

業不足繼也。曷曰吾少無風雲之志，因宦至此，不圖此。郡士人忽爾見推，向言出迎者，未知士大夫之意，故也。因遣繇覘嗣，嗣見繇言，所以代曷之意。繇啖以甘言，及還，謂曷曰：「嗣志驕兵弱，此成擒耳。」於是曷遣二子歆讓與繇，繇及司馬尹建興等逆擊破之。嗣奔還，張掖初曷素與嗣善，結為刎頸之交。嗣常以宗族托曷，曰：「我身猶子，身勿為疑也。」及是，曷反為嗣所構，故深恨之，乃罪狀嗣於段業，自表盡忠不貳，橫為嗣所讒，請業殺嗣。曷當

自歸司敗業輔國將軍沮渠男成亦惡嗣因勸除之業
乃殺嗣遣使謝嵩分燉煌之涼興烏澤晉昌之宜禾三
縣為涼興郡進嵩為使持節都督涼興已西諸軍事鎮
西將軍領護西夷校尉

庚子元年冬十一月嵩所居後園有赤氣起龍跡見於
小城於是晉昌太守唐瑤叛業乃移檄六郡推嵩為大
都督冠軍大將軍沙州刺史領護羌校尉燉煌太守領
秦涼二州牧涼公大赦境內殊死已下建元庚子時晉

隆安四年也追尊祖弇為涼景公父昝為涼簡公子譚
為世子署唐瑤為征東將軍郭謙為軍諮祭酒索仙為
左長史張邈為右長史尹建興為左司馬張體順為右
司馬張條為牧府左長史令狐溢為牧府右長史張綝
為太府主簿宋繇張謖為從事中郎尋加繇為折衝將
軍謖為揚武將軍索承明為牧府右司馬令狐遷為武
衛將軍晉興太守汜德瑜為寧遠將軍西郡太守張靖
為折衝將軍河湟太守索訓為威遠將軍西平太守趙

開為驛馬護軍大夏太守索慈為廣武太守陰亮為西
安太守令狐赫為武威太守索術為武興太守招懷夷
夏人情悅服遣折衝將軍宋繇東伐涼興并擊玉門已
西諸城皆下之遂屯玉門陽關廣田積穀為東伐持久
之計時北涼酒泉太守王德亦叛業自稱河州刺史業
遣將討之德將部曲奔附唐瑤

辛丑二年夏四月初呂光之稱王也遣使市六璽王於
于闐至是王至燉煌納之郡府

壬寅三年春正月嵩於南門外臨水起堂名曰靖恭之
堂以議朝政閱武事圖讚自古聖帝明王忠臣孝子烈
士貞女嵩親為序頌以明鑒戒之義當時文武羣僚亦
皆圖焉有白雀翔於靖恭堂嵩觀之大悅冬十二月沮
渠蒙遜所署西郡太守梁中庸來奔嵩署為牧府主簿
是歲秦姚興遣使拜嵩為安西將軍高昌侯

癸卯四年春正月命立泮宮增高門學生五百人起嘉
納堂於後園以圖讚所志

甲辰五年夏四月有葛緣木而生作黃鳥之形秋八月世子譚卒九月立第二子歆為世子

建初元年春正月曷自稱大都督大將軍領秦涼二州牧改元建初大赦境內殊死已下時晉義熙元年也遣舍人黃始梁興問行奉表詣京師曰昔漢運將終三國鼎峙鈞天之歷數鍾皇晉高祖闡鴻基景文弘帝業嗣武受終要荒率服六合同風宇宙齊貫而惠皇失御權臣亂紀懷愍遽遭蒙塵塞外懸象上分九服下裂眷言

顧之普天同憾伏惟中宗元皇帝基天紹命遷幸江表
荆揚蒙弘覆之矜五都為荒榛之藪故太尉西平武公
軌當元康之初屬擾攘之際受命典方出撫此州威略
所振聲蓋海內明盛繼統不隕前志長旌所指仍闢三
秦義立兵強拓境萬里桓文嗣位奕葉載德囊括關西
化被崑裔遐邇款藩世修職貢晉德之遠揚繁此州是
賴大都督大將軍天錫以英挺之姿承七世之業志匡
時難克隆先勲而中年降災兵寇侵境皇威遐邇同獎

弗及以一方之師抗七州之衆兵孤力屈社稷為墟

一作

喪以臣聞歷數相推歸餘於終帝王之興必有閏位是以

共工亂象於黃農之間秦項篡竊於周漢之際皆機不

旋踵覆餗成凶自戎狄憑陵為時已久五胡僭竊

一作熊字

期運將杪四海顛顛懸心象魏故師次東關趙魏莫不

企踵淮南大捷三方欣然引領伏惟陛下道協少康德

侔光武繼天統位志清函夏至如此州世篤忠義臣之

羣僚以臣高祖東莞太守雍曾祖北地太守柔荷寵前

朝叅叅時務伯祖龍驤將軍廣晉太守長寧侯卓亡祖
武衛將軍天水太守安世亭侯弇毗佐涼州著功秦隴
殊寵之隆勒於天府妄臣無庸輒依竇融故事迫臣以
義上臣大都督大將軍領護羌校尉秦涼二州牧涼公
臣以為荆楚替貢齊桓興召陵之師諸侯不恭晉文起
城濮之後用能勲光踐土業隆一匡九域賴其弘猷春
秋恕其專命功冠當時美垂千祀況今帝居未復諸夏
昏墊大禹所經奄為丘墟五岳神山狄汚其三九州神

都夷穢其七辛有所言於茲而驗微臣所以叩心絕氣
忘寢與食彫肝焦慮不遑寧息者也江涼雖遼義誠密
邇風雲苟通實如唇齒臣雖名未結於天臺量未著於
海內然憑賴累祖寵光餘烈義不細辭以稽大務輒順
羣議亡身即事輟弱任重懼忝威命昔在春秋諸侯宗
周國皆稱元以布時令今天臺邈遠正朔未加發號施
令無以紀數輒年冠建初以崇國憲冀杖寵靈全制一
方便義誠著於所天玄風扇於九壤殉命灰身隕越慷

慨冬十月嵩讌羣僚於嘉納堂因謂之曰昔河右分崩
羣豪競起吾以寡德為衆賢所推何嘗不忘寢與食思
濟黎兆故前遣母弟繇董率雲騎東殄不庭軍之所至
莫不賓下今惟蒙遜鴟峙一城自張掖已東晉之遺黎
雖為戎虜所制至於向義思風過於殷人之望西伯大
業須定不可安寢吾將遷都酒泉漸逼寇穴諸君以為
何如右長史張邈曰殿下此議實社稷之利也乃力贊
成之嵩大悅曰二人同心其利斷金張長史與孤同矣

夫復何疑遂以右司馬張體順為寧遠將軍建康太守
鎮樂涇徵折衝將軍宋繇為右將軍領燉煌護軍與子
燉煌太守讓鎮燉煌遂遷居於酒泉

今之肅州

建初二年春正月嵩手令誡諸子曰吾自立身不營世
利經涉累朝通否任時初不役智有所要求今日之舉
非本願也然事會相驅遂荷州土憂責不輕門戶事重
雖詳人事未知天心登車理轡百慮填膺後事付汝等
粗舉旦夕近事數條遭意便言不能次比至於杜漸防

微深識情變此當任汝所見深淺非吾勅戒所益也汝等雖年未至大若能克己纂脩比之古人亦可以當事業矣苟其不然雖至白首亦復何成汝等其戒之慎之節酒慎言喜怒必思愛而知惡憎而知善動念寬恕審而後與衆之所惡勿輕承信詳審人核真偽遠佞諛近忠正蠲刑獄忍煩擾存高年恤喪病勤省接按聽訟刑法所應和顏任理慎勿以情輕加聲色賞勿漏疎罰勿容親耳目人間知外患苦禁禦左右勿作威福勿伐善

施勞逆詐意必以示已明廣加諮詢無自專用從善如
順流去惡如探湯富貴而不驕者至難也念此貫心勿
忘須臾察佐邑宿盡禮承敬讌饗饌食事事留懷古今
成敗不可不知退朝之暇念觀典籍面牆而立不成人
也此郡世篤忠厚人物敦雅天下全盛時海內猶稱之
況復今日實是名邦正為五百年鄉黨姻親相連至於
公理時有小小頗迴一作遠為當隨宜斟酌吾臨蒞五年
兵難騷動未得休衆息後惠康士庶至於掩瑕藏疾滌

疵除垢朝為寇讐夕委心膺雖未足希準古人粗亦無

負於新哲

哲一作德

事任公平坦然無類初不容懷有所損

益計近則如不足經遠乃為有餘庶亦無媿前人也秋
八月南涼禿髮傉檀送高女敬愛於酒泉并通和好初
高之立也留女敬愛養於外祖尹文家文既東遷高從
姑梁裒之母養之至是傉檀假道於北山鮮卑使裒送
敬愛于酒泉并通和好高大喜遣使報聘傉檀贈以方
物九月高親率騎二萬略地至於建康東郭善前部王

遣使貢其方物冬十月北涼沮渠蒙遜來侵至於建康掠三千餘戶而去曷大怒率騎追之及於彌安大敗之盡收所掠之戶初秦建元之末徙江漢一萬餘戶於燉煌中州之人有田疇不闢者亦徙七千餘戶郭橐之寇武威武威張掖已東人西奔燉煌晉昌者數千戶及曷東遷皆徙之酒泉分南人五千戶置會稽郡中州人五千戶置廣夏郡餘萬三千戶分置武威武興張掖三郡築城於燉煌南子亭以威南虜是年曷造珠碧刀二口

銘其背曰百勝隸書

建初三年冬十二月嵩以前表未報復遣沙門法泉問
行奉表於晉曰江山悠隔朝宗無階延首雲極翹企遐
方伏惟陛下應期踐位景福自天臣去乙巳歲順從羣
議假統方域時遣舍人黃始奉表通誠遙途嶮曠未知
達否吳涼懸邈蜂蠆衝衛方珍貢使無由展御謹副寫
前章或希簡達臣以其歲進師酒泉戒戎廣平庶攘茨
穢而黠虜恣睢未率威教憑守巢穴阻臣前路竊以諸

事草創倉帑未盈故息兵按甲務農養士時移日邁往
再三年撫劍歎憤以日成歲今資儲已足器械已充西
招城郭之兵北引丁零之衆冀憑國威席捲河隴揚旌
秦川承望詔旨盡節竭誠隕越為效又臣州界迥遠勅
寇未除當須鎮副為行留部分輒假臣世子歆監前鋒
諸軍事撫軍將軍護羌校尉督攝前軍為臣先驅又燉
煌郡大衆殷繁制御西域管轄萬里為軍國之本輒以
次子讓為寧朔將軍西夷校尉燉煌太守統攝崑裔輯

寧殊方自餘諸子皆在戎間率先士伍臣總攝大綱畢
在輸力臨機制命動靜續聞曷既遷酒泉乃敦勸稼穡
羣僚以年穀頻登百姓樂業請勒銘於酒泉乃許之於
是使儒林祭酒劉昫為文刻石頌德

建初四年時有白狼白兔白雀白雉白鳩皆棲其園囿
羣僚以為白祥金精所誕皆應時雖而至又有神光甘
露連理嘉禾衆瑞請史官紀其事曷從之初河右不生
楸槐柏漆張駿之世取於秦隴而植之終於皆死至是

而酒泉宮之西北隅有槐樹生焉乃著槐樹賦以寄情
蓋嘆僻陋遐方立功非所也遂命主簿梁中庸及儒林
祭酒劉昺等並作

建初五年

建初六年春三月魏安焦朗據姑臧自號龍驤大將軍
遣使稱臣嵩因其所稱而授之秋七月沮渠蒙遜率騎
來攻嵩遣世子歆及別將朱元虎禦之戰於馬廟歆敗
元虎被禽嵩以銀二千斤金二千兩贖元虎蒙遜歸之

曷遂與蒙遜結盟而還

建初七年秋八月蒙遜復背前盟率輕騎來襲曷曰兵有不戰而敗敵者挫其銳也蒙遜新與吾盟而遽來襲我我閉門不與戰待其銳氣已竭徐而擊之蔑不克矣頃之蒙遜糧盡引去曷遣世子歆帥騎五千邀擊敗之獲其將沮渠百年

建初八年

建初九年春三月上巳曷讌於曲水命羣僚賦詩而親

為之序冬十月書寫諸葛亮訓誡以勗諸子曰吾負荷
艱難寧濟之勲未建雖外總良能憑股肱之力而戎務
孔殷坐而待旦以維城之固宜兼親賢故使汝等未及
師保之訓皆弱冠受任常懼弗克以貽咎悔古今之事
不可不知苟近而可師何必遠也覽諸葛亮訓勵應璩
奏諫尋其始終周孔之教盡在中矣為國足以致安立
身足以成名質略易通寓目則了雖言發往人道師於
此且經史道德如採菽中原勤之者則功多汝等可不

勉哉曷乃修燉煌舊塞東西二園以防北虜之患築燉煌舊塞西南二園以威南虜

建初十年曷以偉世之量當呂氏之末為羣雄所奉遂起伯圖兵無血刃坐定千里謂張氏之業指日而成河西十郡歲月而一既而禿髮儁犢入據姑臧沮渠蒙遜基宇稍廣於是慨然著述志賦焉其辭曰涉至虛以誕駕乘有與於本無稟玄元而陶衍承景靈之冥符陰朝雲之菴靄仰朗日之照煦既敷既載以育以成幼希顏

子曲肱之榮游心上典翫禮敦經茂玄冕於朱門羨漆
園之傲生尚漁父於滄浪善沮溺之耦耕穡鴟鳶之籠
嚇欽飛鳳於太清杜世競於方寸絕時譽之嘉聲超霄
吟於崇嶺奇秀木之凌霜挺脩幹之青蔥經歲寒而彌
芳情遙遙以遠寄想四老之暉光將戢繁榮於常衢控
雲轡而高驤攀瓊芝於玄圃漱華泉之淥漿和吟鳳之
逸響應鳴鸞於南崗時弗獲彰心往形留眷駕陽林宛
首一丘衝風沐雨載沉載浮利害繽紛以交錯歡感循

環而相求乾扉奄寂以重閉天池絕津而無舟悼貞信
之道薄謝慙德於園流遂乃去玄覽應世賓肇弱巾於
東宮並羽儀於英倫踐宣德之祕庭翼明后於紫宸赫
赫謙光奕奕崇明岌岌王居詵詵百辟君希虞夏臣庶
變並張王頽巖梁后墜壑淳風杪莽以永喪措紳淪胥
而覆溺呂發釁於閨牆厥構摧以傾顛疾風飄於高木
迴湯沸於重泉飛塵翕以蔽日大火炎其燎原名都幽
然影絕千邑間而無烟斯乃百六之恒數起滅相因而

迭然於是人希逐鹿之圖家有雄霸之想閤王命而不
尋邀非分於無象故覆車接路而繼軌膏生靈於土壤
哀餘類之忪懔邈靡依而靡仰求欲專而失逾遠寄玄
珠於罔象悠悠涼道鞠焉荒凶眇眇余躬迢迢西邦非
相期之所會諒冥契而來同跨弱水以建基躡崑墟以
為壙總奔駟之駭轡接摧轅於峻峰崇崖巉巖重嶮萬
尋玄邃窈窕磐紆欽岑榛棘交橫河廣水深狐狸夾路
鴟鵂羣吟挺非我以為用任至當如影響執同心以御

物懷自彼於握掌匪矯情而任荒乃冥合而一往華德
是用來庭野逸所以就鞅休矣時英茂哉雋哲庶罩網
以遠籠豈徒射鈎與斬袂或脫梏而纓絰或後至而先
列採殊才於巖陸拔翹彥於無際思留侯之神遇振高
浪以蕩穢想孔明於草廬運玄籌之罔滯洪操檣而慷
慨起三軍以激銳詠羣豪之高軌嘉關張之飄驍傑誓
報曹而歸劉何義勇之超世據斷橋而橫矛亦雄姿之
壯發輝輝南珍英英周魯挺奇荆吳昭文烈武建策烏

林龍驟江浦摧堂堂之勁陣鬱風翔而雲舉紹樊韓之
遠蹤倅徽猷於召武非劉孫之鴻度孰能臻茲大祐信
乾坤之相成庶物希風而潤雨岷益既蕩三江已清穆
穆盛勲濟濟隆平御羣龍而奮策彌萬載以飛榮仰遺
塵於絕代企高山而景行將建朱旗以啓路驅長轂而
迅征靡商風以抗旆拂招搖之華旌資神兆於皇極協
五緯之所寧赳赳干城翼翼上弼志馘奔鯨截彼醜類
且灑遊塵於當陽拯涼德於已墜間昌寓之駉乘暨襄

城而按轡知去害之在茲體牧童之所述審機動之至
微思遺餐而忘寐表略韻於紈素託精誠於白日又感
兵難繁興時俗誼競乃著大酒容賦以表恬豁之懷初
嵩與辛景辛恭靖同志友善景等歸晉遇害江南嵩聞
而吊之嵩前妻同郡辛納女貞順有婦儀先卒乃親為
之誄自餘詩賦數十篇

建初十一年

建初十二年夏六月北涼沮渠蒙遜每年侵寇嵩志在

以德撫其境內但與通和立盟弗之與校司馬索承明
上書勸伐蒙遜曷引見謂之曰蒙遜為百姓患孤豈忘
之顧勢力未能除耳卿有必禽之策當為孤陳之直唱
大言使孤東討此與言石虎小豎宜肆諸市朝者何異
承明慙懼而退

建初十三年春正月曷寢疾顧命長史宋繇曰吾少罹
荼毒百艱備嘗乃於喪亂之際遂為此方所推才弱智
淺不能一同河右今氣力憊然當不復起矣死者大理

吾不悲之所恨志不伸耳居元首之位者宜深戒危殆
之機吾死之後世子猶卿子也善相輔導述吾平生勿
令居人之土專驕自任軍國之宜委之於卿無使籌略
乖衷失成敗之要遂以晉義熙十三年二月薨於光德
殿時年六十七在位十八年葬建世陵謚武昭王廟號
太祖

十六國春秋卷九十一

謹案卷九十一第十五頁後四行耿耿余躬刊本
耿耿抄今改





覆校官編修臣張秉愚

校對官編修臣裴謙

謄錄監生臣程蓮孫

欽定四庫全書薈要

史部

十六國春秋卷九十五

二五

詳校官員外郎臣楊世綸



十六國春秋卷九十二

西涼錄二

李歆

李歆字士業，嵩第二子也。為撫軍將軍，領護羌校尉，監前鋒諸軍事。嵩死，左長史宋繇等上為大都督、大將軍，領護羌校尉、涼州牧、涼公，大赦境內。歆死，已下。改元嘉興。尊母尹氏為太后，以宋繇為武衛將軍，廣夏太守。軍

詔祭酒錄三府事索仙為征虜將軍張掖太守三月河西王沮渠蒙遜遣張掖太守沮渠廣宗詐降於歆以誘之歆遣武衛將軍溫宜等率兵往赴親勒大軍為之後繼蒙遜率衆三萬設伏於蓼泉歆聞之引兵還蒙遜率衆來追歆親貫甲與戰於解支澗大破之追奔百餘里俘斬七千餘級蒙遜城建康置戍而去

嘉興二年秋九月沮渠蒙遜復率衆來伐歆將出拒之左長史張體順固諫乃止蒙遜大芟秋麥而去是歲歆

遣使告晉嗣位冬十月晉拜歆為使持節都督七郡諸
軍事鎮西大將軍護羌校尉涼州牧酒泉公

嘉興三年夏六月歆用刑過嚴又好治宮室繕築不止

從事中郎張顗

一作顗

上疏切諫曰涼土三分勢不久立

并兼之本實在農戰懷遠之略莫如寬簡今入歲已來
陰陽失序屢有賊風暴雨犯傷和氣是宜減膳徹懸側
身修道

一作過

而更繁刑峻法宮室是務人力殘凋百姓

愁悴致災之咎實此之由昔文王以百里而興二世以

天下而亡前車之軌得失昭然太祖以天挺神姿應桓

文之運流標萬里為西夏所推左取酒泉有易俯拾右

開西域兵不血刃實為殿下開創崇規貽厥孫謀者也

殿下不能奉承先志混一涼土佯蹤張后將何以下見

先王乎沮渠蒙遜胡夷之傑內修政事外理英賢攻戰

之際身同

一作均

士卒百姓懷之咸樂為用臣謂殿下非

但不能平殄蒙遜亦懼蒙遜方為社稷之憂歆覽之不

悅主簿汜稱又上疏諫曰臣聞天之子愛人主憂勤至

矣故政之不修則垂災譴以戒告之改者雖危必昌宋景
是也其不改者雖安必亡號公是也殿下嗣位以來元年
三月癸卯燬煌謙德堂陷八月效穀地裂二年元日昏霧
四塞四月日亦無光二旬乃復十一月狐上南門今茲春
夏地頻五震六月隕星於建康臣雖學不稽古敏謝仲舒
頗亦聞道於先師且行年五十有九請為殿下略言耳目
之所聞見不復能遠論書傳之事也乃者咸安之初西平
地裂狐入謙光殿前俄而秦師奄至都城不守梁熙既為

涼州藉秦氏兵亂規有全涼之地外不撫百姓內多為聚
斂尋以滅亡建元十九年姑臧南門崩隕石於閑豫堂二
十年而呂光東反子敗於前身戮於後段業因羣胡創亂
稱制北方三年之中地震五十餘所既而先王龍興於瓜
州蒙遜篡弒於張掖此皆目前之成事亦殿下之所聞
知效穀先王鴻漸之地謙德即尊之室基陷地裂太凶
之徵也日者太陽之精中國之象赤而無光中國將為
胡夷之所陵滅諺曰野豕入家主人將去今狐上南門

亦變異之大也又狐者胡也天意若曰將有胡人入居
於此城南面而君者也昔春秋之世星隕於宋襄公卒
為楚所禽地者至陰胡夷之象當靜而動反亂天常天
意若曰胡夷將震動中國中國若不修德將有宋襄之
禍今蠻夷益盛中國益微臣蒙先朝布衣之眷輒自同
子弟之親是以不避忤上之誅昧死而進愚款願殿下
親仁善隣養威觀釁罷宮室之務止遊畋之娛宮嬪妃
媼諸夷子女躬受分田身勸蠶績以清儉素德為榮息

茲奢靡之費百姓租稅專擬軍國虛衿下士廣招賢俊
修秦氏之術以強國富俗待國有數年之積庭盈文武
之臣然後命韓白為前驅納子房之妙算一鼓可以平
定姑臧長驅可以飲馬涇渭方南面而爭天下豈蒙遜
之足憂不然臣恐社稷之危必不出紀歆亦不納

嘉興四年夏六月晉恭帝禪位於宋秋七月歆遣使貢
獻於宋甲辰宋詔以歆為都督高昌等十郡諸軍事征
西大將軍酒泉公歆將謀東伐張體順切諫止之又聞

沮渠蒙遜攻秦浩臺命中外戒嚴將攻張掖尹太后以

為不可

具太后傳

宋繇亦固諫歆不聽繇退而嘆曰大事

去矣吾見師之出不見師之還也歆遂率步騎三萬東

出蒙遜聞之曰歆已入吾計中然聞吾旋師必不敢前

乃露布西境云已剋浩臺將進攻黃峪歆聞之喜進次

都瀆澗蒙遜自浩臺來拒戰於懷城敗績勒衆復戰敗

於蓼泉為蒙遜所殺歆子重耳脫身奔於江左遂仕於

宋後復歸魏為魏弘農太守歆諸弟驍騎將軍酒泉太

守翻擊虜將軍新城太守豫征西將軍燉煌太守恂領
羽林右監密左將軍眺右將軍亮等皆西奔燉煌尋棄
燉煌奔入北山蒙遜入酒泉禁兵侵掠士民安堵以宋
繇為吏部郎中委之選舉涼之舊臣有才望者咸禮而
用之尹太后及諸女死於伊吾先是高嘗夢為涼公領
涼州牧代沮渠氏至是歆為蒙遜所殺歆之未敗也有
一大蛇從南門而入至於恭德殿前又有雙雉飛出宮
內通街大樹上有烏鵲爭巢鵲為烏所殺又燉煌父老

令狐熾家見一白頭翁衣恰而謂之曰南風動吹長木
胡桐椎不中穀言訖忽然不見歆小字桐椎至是而亡
自曷僭位元年歲在庚子至歆為蒙遜所滅歲在庚申
凡二十一年

案唐書曷本老子之裔也曷子歆歆子重耳魏弘農
太守重耳子熙金門鎮將家于武川熙子天賜為幢
主天賜子虎為後周太祖宇文泰開國功臣魏賜姓
大野氏官至太尉號為柱國宇文氏受魏禪時虎已

卒追錄佐命功封唐國公以其子昞襲封隋代周復
姓李氏昞官至隋安州總管柱國大將軍昞生子淵
襲封唐公後賴次子秦王世民之力代隋而為天子
是為唐高祖秦王四征寇盜以壹天下是為太宗邈
長發之祥則嚮之於唐其猶周之后稷矣高祖武德
元年追謚皇高祖熙曰宣簡公皇曾祖天賜曰懿王
皇祖虎曰景皇帝廟號太祖皇考昞曰元皇帝廟號
世祖與武昭王祖父並祀以天子之禮太宗子高宗

治追號老子為太上玄元皇帝尊宣簡公為宣皇帝
懿王為光皇帝高宗孫玄宗隆基加宣皇帝曰獻祖
光皇帝曰懿祖尋加玄元號曰大聖祖又追號聖祖
父周大夫敬曰先天太皇遠祖咎繇曰德明皇帝西
涼武昭王曰興聖皇帝

十六國春秋卷九十二

十六國春秋卷九十三

西涼錄三

李恂

李恂字士誠歆之弟嵩第六子也為燉煌太守歆為沮渠蒙遜所殺恂與兄翻等自燉煌奔於北山蒙遜以索嗣之子元緒行燉煌太守元緒竄險好殺大失人和郡人宋承一作朱承張弘等以恂在郡有惠政密信招恂恂遂

率千騎入於燉煌元緒東奔涼興承等推恂為冠軍將軍涼州刺史改元永建蒙遜遣世子德政率衆二萬攻之恂閉門不戰攻之不下蒙遜乃自率衆來攻三面起堤引水灌城恂遣壯士一千連版為橋潛欲決堤蒙遜勒兵逆戰承等開門出降恂先殺其妻子自殺蒙遜遂屠其城

李翻

李翻字士舉小字武彊焉少子也歷驍騎將軍祈連晉

昌酒泉三郡太守翻子寶字懷素小字衍孫沉雅有度量驍勇善撫接伯父歆為沮渠蒙遜所滅父翻奔於北山蒙遜乃徙寶於姑臧歲餘隨舅唐契北奔伊吾臣於蠕蠕遺民歸附者稍至二千寶傾身接禮甚得衆心皆樂為用每希報雪其後魏世祖遣將討沮渠無諱於燉煌無諱捐城遁走寶自伊吾率流人及虜騎南襲燉煌據之修繕城府規復先業遣弟懷達奉表歸魏世祖嘉其忠款拜懷達散騎常侍燉煌太守別遣使授寶為使

持節侍中都督西垂諸軍事鎮西大將軍開府儀同三司領護西戎校尉沙州牧燉煌公仍鎮燉煌承制玉門已西甚著威惠於西土百姓懷之在燉煌三年因入朝遂留京師徙為鎮南將軍并州刺史轉鎮北將軍魏太安五年卒謚曰宣公有六子冲最知名歷顯位

高妻尹氏

尹氏天水冀人尹文之女也幼而好學清辨有志節初適扶風馬元正元正卒為高繼室自以再醮之故三年

不言撫前妻子踰於已生焉之創業謀謨經略多所贊
毘故西州諺曰李尹王燉煌及焉死子歆嗣位尊為太
后河西王沮渠蒙遜來伐先引兵攻秦浩臺歆欲乘虛
襲張掖尹氏謂歆曰汝新造之國地狹民希自守猶懼
不足何暇伐人度德量力春秋之義先王臨終遺令殷
勤戒汝深慎用兵保境安民以俟天時言猶在耳奈何
棄之況蒙遜驍武善於用兵汝非其敵觀其數年以來
經謀規略常有兼并之志且天時人事似欲歸之汝國

雖小足為善政修德養民靜以俟之彼若昏暴民將歸
汝若其休明汝將事之豈得輕為舉動僥冀非望以吾
觀之非但喪師殆將亡國敵不能聽為蒙遜所敗歆曰
吾違老母明勅遠取敗辱不殺此胡復何面目見我母
也勒兵進戰遂大敗死蒙遜入姑臧見尹氏而勞之尹
氏曰李氏為胡所滅知復何言或謂尹氏曰今母子之
命在人掌握奈何倨傲之且國亡子死曾無憂色何也
尹氏曰存亡死生皆有天命奈何更如凡人為兒女子

之悲耶吾一老婦人國亡家破豈可復惜餘生為人臣
妾惟速死為幸耳蒙遜嘉而赦之娶其女為茂虔婦及
世祖以妹武威公主娶茂虔尹氏與女遷居酒泉頃之
女卒尹氏撫之不哭曰汝國破家亡今死晚矣茂虔之
弟無諱鎮酒泉每謂尹氏曰后諸孫在伊吾后欲就之
乎尹氏未測其意給之曰吾子孫漂蕩託身異域餘生
無幾便當死此不復作羶裘鬼也未幾潛奔伊吾無諱
遣騎追及之尹氏謂追騎曰沮渠酒泉許吾北歸何為

復追汝取吾首以往終不復還矣追騎遂不敢逼引還
尹氏至於伊吾年七十五卒

宋繇

宋繇字體業燉煌人也曾祖配祖悌世仕張軌子孫父
僚為張玄靚龍驤將軍武興太守繇生而僚為張邕所
殺五歲喪母事伯母張氏以孝聞八歲而張氏卒居喪
過禮繇少而有志尚喟然謂妹夫張彥曰門戶傾覆負
荷在繇不銜膽自勵何以繼承先業遂隨彥至酒泉從

師就學閉戶讀書晝夜不輟博通經史諸子羣言莫不
綜覽呂光舉為秀才除郎中後奔段業拜散騎常侍繇
以業無經濟遠略西奔於高麗從事中郎尋加折衝將
軍轉右將軍領燉煌護軍左長史受遺輔政及歿嗣位
遷武衛將軍廣夏太守位至通顯家無餘財雅好儒學
雖在兵旅講誦不廢每聞儒士在門常倒屣出迎停寢
政事引談經籍尤明斷決事無淹滯沮渠蒙遜平酒泉
於繇室得書數千卷鹽米十餘斛而已蒙遜嘆曰孤不

喜得李歆得宋繇耳拜尚書吏部郎中委以銓衡之任蒙遜死以子茂虔托之茂虔以繇為左丞送其妹興平公主於魏世祖拜繇為河西王右丞相賜爵清水公加安遠將軍魏并涼州從茂虔至魏卒

劉昞

劉昞字彥明燉煌人也父寶字子玉以儒學見稱昞年十四就博士郭瑀學時瑀弟子五百餘人通經業者八十餘人瑀有女始笄妙選良偶有心於昞遂改設一席

於坐前謂諸弟子曰吾有一女年向長成欲覓一快婿
誰坐此席者吾當婚焉昞遂奮衣來坐神志肅然曰向
聞先生欲求快女婿昞其人也遂以女妻之昞後隱居
酒泉不應州郡辟命弟子受業者常數百人武昭王嵩
徵為儒林祭酒從事中郎嵩雅好文典書史穿落者親
自補治昞時侍側前請代嵩嵩曰躬自執者欲人重此
典籍吾與卿相值何異孔明之會玄德遷撫夷護軍雖
有政務手不釋卷嵩謂之曰卿注記篇籍以燭繼晷白

日且然夜可休息晒曰朝聞道夕死可矣不知老之將至孔聖稱焉晒何人斯敢不如此晒以三史文繁著略記百三十篇八十四卷涼書十卷燉煌實錄二十卷方言三卷靖恭堂銘一卷并著周易韓子人物志黃石公三略並行於世後蒙遜平酒泉拜祕書郎中築陸沉觀於西苑躬往禮焉號玄處先生北涼錄自有傳

唐繇

唐繇晉昌宜安人也以涼土喪亂民無所歸推嵩霸於

河右以寧一方及涼亡繇子和與兄契攜其甥武昭王
孫實避難伊吾招集人衆二千餘家臣於蠕蠕蠕蠕以
契為伊吾王經二十餘年和與契遣使降魏遂為蠕蠕
所逼擁部衆至高昌蠕蠕復遣部帥阿若討之至白力
城和先攻高昌契與阿若戰敗沒和收餘衆奔前部王
國時沮渠安周屯橫截城和攻拔之斬安周兄子樹後
又從伊洛擊高寧白力二城剋之遣使奉表歸魏

辛淵

辛淵字子深隴西狄道人也四世祖怡晉幽州刺史寧朔將軍淵仕嵩為驍騎將軍歆亦善遇之歆與沮渠家遜戰於蓼泉軍敗失馬淵以所乘馬授歆而身死於難遂以義烈見稱於西土云其後子孫仕魏俱至顯官

陰仲達

陰仲達武威姑臧人也祖訓字處道仕嵩為武威太守父華字李文仕姑臧令仲達以文學知名西土

十六國春秋卷九十三

十六國春秋卷九十四

北涼錄一

沮渠蒙遜

沮渠蒙遜本張掖臨松盧水胡人也匈奴有左沮渠右
沮渠之官蒙遜之先世曾為此職故遂以官為氏世居
盧水為酋豪高祖暉仲歸曾祖遮皆雄健有勇力祖祁
復延封北地王

北一作狄
又作乞

父法弘襲爵苻堅時以為中

田護軍卒蒙遜代領部曲雄桀多策畧好學涉獵書史
頗曉天文滑稽善權變數為諸胡所推服梁熙呂光皆
竒而憚之故常遊飲以自晦光之王於涼土使蒙遜自
領營人配箱直又以蒙遜伯父羅仇為西平太守仇弟
麴粥為三河太守光遣其子慕瓚率仇粥征河南王乞
伏乾歸於枹罕前軍敗績麴粥言於羅仇曰主上昏耄
驕縱諸子朋黨相傾讒人側目今軍敗將死正其智勇
猜忌之時可不懼乎吾兄弟素為所憚必不見容與其

死之無名不若勒衆向西平出荅藿奮臂大呼涼州不足定也羅仇曰誠如汝言然吾家世以忠孝著於西土一方所推寧使人負我我不忍負人也未幾光果聽讒以敗軍之罪殺仇及粥蒙遜以仇粥之喪歸葬諸部多其姻族會葬者凡萬餘人蒙遜哭謂衆曰昔漢祚中微吾之乃祖翼獎竇融保寧河右呂王昏耄荒虐無道多殺不辜豈可坐觀成敗不上繼先祖安民之志下使二父有恨黃泉衆咸稱萬歲遂結謀起兵殺光中田護軍

馬邃進攻臨松郡殺縣令井祥以盟一旬之間衆至萬
餘屯據金山光遣呂纂逆擊蒙遜於忽谷蒙遜敗績將
六七十人逃入山中家戶悉亡散時從兄晉昌太守男成
聞蒙遜起兵亦合衆數千還屯樂綰殺酒泉太守疊膝
一作壘澄蒙遜乃收集部曲投之共推建康太守段業為使
持節大都督龍驤大將軍涼州牧建康公改呂光龍飛
二年為神璽元年業以蒙遜為鎮西將軍張掖太守男
成為輔國將軍酒泉太守軍國之事悉以委之

神璽二年夏四月段業將遣蒙遜攻光西郡太守呂純
衆咸疑之蒙遜曰此郡據嶺之要不可不取業曰卿言
是也遂遣之經旬不克乃引水灌城城潰執純以歸於
是晉昌太守王德燾煌太守孟敏皆以郡降業業封蒙
遜為臨池侯以德為酒泉太守敏為沙州刺史徙男成
為晉昌太守六月業遣男成及王德攻光常山公呂弘
弘引兵棄張掖東走業遂徙治張掖議欲追擊之蒙遜
諫曰歸師勿遏窮寇弗追此兵家之法也不如縱之以

為後圖業曰一日縱敵悔將何及遂率眾追之為弘所敗賴蒙遜救以免業嘆曰孤不能用子房之言以至於此冬十月業築西安城以別將臧莫孩為太守蒙遜曰莫孩勇而無謀知進不知退此乃為之築家非築城也業不從尋為呂纂所破蒙遜懼業不能容已每匿智以避之

天璽元年春二月業僭稱涼王赦其境內改元天璽以蒙遜為尚書左丞梁中庸為右丞夏五月三河王呂光

遣其二子紹纂來攻業請救於禿髮烏孤烏孤遣弟利
鹿孤及楊軌救之紹等引軍而南業將擊之蒙遜諫曰
楊軌恃鮮卑一作虜騎之強有窺覷之心紹纂深入置兵死
地必決戰求生不可敵也今不戰則有泰山之安戰則
有累卵之危業曰卿言是也按兵不戰紹亦難之各引
兵歸

天璽二年春正月前晉昌太守唐瑤叛歸李嵩酒泉太
守王德亦叛自稱河州刺史業使蒙遜討之德焚城將

部曲奔唐瑤蒙遜追至沙頭大破之虜其妻子部曲而
還夏四月業懼蒙遜雄武微欲遠之乃以蒙遜從叔益
生為酒泉太守蒙遜為臨池太守以門下侍郎馬權代
蒙遜為張掖太守權每輕侮蒙遜蒙遜譖而殺之因謂
男成曰段業愚暗非濟世之才信讒愛佞無鑒斷之明
向所憚者惟索嗣馬權今皆誅之蒙遜欲除業以奉兄
何如男成曰業羈旅孤飄為吾家所建立恃吾兄弟猶
魚之有水人既親之背之不祥乃止

永安元年春正月蒙遜既為業所憚內不自安求為西
安太守業亦以蒙遜有大志懼為朝夕之變喜其出外
許之蒙遜期與男成同祭蘭門山密遣司馬許咸告業
曰男成欲謀叛許以取假日作逆若求祭蘭門山臣言
驗矣至期果然夏四月業收男成逼令自殺男成曰蒙
遜欲謀叛先已告臣臣以兄弟之故隱忍不言以臣今
在恐部衆不從故與臣克期祭山反相誣告其意欲王
之殺臣也臣若朝死蒙遜必夕發乞詐言臣死暴臣罪

惡蒙遜必反臣然後奉王命投袂討之事無不捷業不從竟殺之蒙遜聞男成死泣告衆曰男成忠於段王而段王無故枉見屠害諸君能為報仇乎且州土兵亂似非段王所能濟也吾所以初奉之者以之為陳吳耳而信讒多忌枉害忠良豈可安枕卧觀使百姓罹於塗炭男成素得衆心衆皆憤泣爭奮比至氏池衆逾一萬鎮軍將軍臧莫孩率所部來降羌胡多起兵嚮應之者蒙遜進壁侯塢業先疑右將軍田昂幽之於內至是召昂

謝而赦之使與武衛將軍梁中庸等攻蒙遜於侯塢業
別將王豐孫言於業曰西平諸田世有反者昂貌恭而
心狠志大而情險不可信也業曰吾疑之久矣但非昂
無可以討蒙遜者豐孫言既不從昂至侯塢蒙遜自氐
池逆之昂率騎五百降於蒙遜軍遂大潰中庸亦率衆
來降五月蒙遜至張掖田昂兄子承愛斬關內之業左
右散走蒙遜大呼曰鎮西何在軍人曰在此業曰孤單
瓢一作飄一已為貴門所推願丐餘命投身嶺南庶得東

還與妻子相見蒙遜不許遂斬之業京兆人也博涉史傳有尺牘之才為杜進記室從征塞表儒素長者無他權畧威禁不行羣下擅命尤信卜筮讖記巫覡徵祥故為奸佞所誤男成弟富占將軍俱僚帥戶五百降於河西王利鹿孤六月梁中庸房畧田昂等共推蒙遜為使持節大都督大將軍涼州牧張掖公大赦境內殊死已下改元永安

白帖作永和

署置百官從兄伏奴為鎮軍將軍

張掖太守和平侯弟挈為建忠將軍都谷侯田昂為鎮

南將軍西郡太守臧莫孩為輔國將軍房晷為左長史
梁中庸為右長史張騰為左司馬謝正禮為右司馬擢
任賢才文武咸悅是月燉煌太守李嵩亦起兵自號冠
軍大將軍西胡校尉沙州刺史太守如故稱元庚子與
蒙遜相抗秋七月秦姚興遣隴西公姚碩德攻呂隆於
姑臧蒙遜因遣從事中郎李興聘於秦以通和好八月
蒙遜所部酒泉涼寧二郡叛降於西涼李嵩又聞呂隆
降秦大懼遣建忠將軍挈牧府長史張潛見碩德於姑

臧請軍迎接率部人東遷碩德大悅拜潛張掖太守挈
建康太守潛勸蒙遜東遷挈私謂蒙遜曰呂氏猶存姑
臧未拔碩德糧竭將還必不能久何故違離桑梓受制
於人乎輔國將軍臧莫孩曰建忠之言是也蒙遜乃斬
張潛因下書曰孤以虛薄猥忝時運未能弘闡大猷戡
蕩群孽使桃蟲鼓翼東京封豕烝涉西裔戎車屢動干
戈未戢農失三時之業百姓戶不粒食可蠲省百徭專
功南畝明設科條務盡地力九月遣子奚念為質於河

西王利鹿孤利鹿孤不受曰奚念年少可遣挈也冬十月蒙遜復遣使上疏於利鹿孤曰臣前遣奚念具披誠款而聖旨未昭復徵臣弟挈臣竊以為苟有誠信則子不為輕若其不信則弟不為重今寇難未夷不獲奉詔願陛下亮之利鹿孤怒遣昌松侯一作張松禿髮俱延興城侯禿髮文支將騎一萬襲來擊之至萬歲臨松執從弟鄯善苟子虜其民六千餘戶十二月蒙遜遣從叔孔遮入朝於利鹿孤許以挈為質利鹿孤乃歸其所掠召俱

延等還

永安二年春二月蒙遜與西平侯禿髮檀共攻涼州
為呂隆所破冬十月西涼李暠遣唐瑤及鷹揚將軍宋
繇攻酒泉獲太守益生十二月蒙遜所署西郡太守梁
中庸奔於李暠是年大風震電於震所得石冊

永安三年春正月蒙遜下令曰養老乞言晉文納輿人
之誦所以能招禮英奇致時雍之美也况孤薄德寡昧
智不經遠可不思聞讜言以自鏡哉內外臣僚其各搜

揚賢雋廣進芻蕘以匡孤不逮

永安四年春二月呂隆以蒙遜僭檀文侵遣弟呂超求
迎於秦夏六月蒙遜遣輔國將軍臧莫孩襲山北虜大
破之虜其民五千戶而還秋八月秦姚興遣尚書左僕
射齊難等率衆迎隆隆勸難引兵來伐難從之蒙遜使
臧莫孩敗其前軍難乃結盟而還蒙遜遣弟建忠將軍
挈入貢於秦是時蒙遜伯父中田護軍親信臨松太守
孔篤竝驕奢侵害百姓苦之蒙遜曰亂吾國者二伯父

也何以綱紀百姓乎皆逼之令自殺冬十月秦遣鴻臚
梁斐張構等拜蒙遜鎮西大將軍開府儀同三司沙州
刺史西海侯時秦亦拜禿髮儁檀為車騎將軍封廣武
公蒙遜聞之不悅謂斐等曰儁檀上公之位而身為侯
者何也構對曰儁檀輕狡不仁款誠未著故朝廷以重
爵虛名羈縻之褒其歸善即叙之義耳將軍忠貫白日
勲高一時當入諧鼎味匡贊帝室安可以不信相待也
聖朝爵必稱功官不越德如尹緯姚晃佐命初基齊難

徐洛元勲驍將竝位纔二品爵止侯伯將軍何以先之
乎昔竇融殷勤固讓不欲居舊臣之右不意將軍忽有
此問蒙遜曰朝廷何不即以張掖見封而更遠封西海
耶構曰張掖規畫之內將軍已自有之所以遠授西海
者蓋欲廣大將軍之國耳蒙遜大悅乃拜受之

永安五年春二月蒙遜襲狄洛磐於番禾不克遷其民
五百餘戶而還是年造刀一百口銘曰永安隸書

永安六年秋八月西涼李嵩遷都酒泉漸逼蒙遜蒙遜

攝軍以禦之

永安七年夏六月南涼禿髮儁檀率衆來攻蒙遜嬰城固守儁檀至赤泉虜掠而去秋八月蒙遜襲西涼李嵩於酒泉至安彌一作安珍去城六十里嵩乃覺引軍出戰遂大破之嵩閉城自守蒙遜亦引而歸

永安八年春二月兩月

一作日

竝出山崩地震折木太史

令劉梁言於蒙遜曰辛酉金也地動於金金動刻木大軍東行無前之徵時張掖城每有光色蒙遜曰王氣將

成百戰百勝之象也遂攻禿髮儋檀於均石大戰破之
進攻西郡太守楊統於日勒拔之統降拜為右長史寵
待踰於功舊

永安九年酒泉南有銅駝山言犯之者輒大雨雪蒙遜
遣工取之得銅萬斤

永安十年春二月張掖太守句呼勒出奔李暠秋七月
蒙遜以羅仇子成都為金山太守麴粥子鄯善為西郡
太守句呼勒自西涼奔還待之如初蒙遜率騎二萬東

征次於丹嶺北虜大人思盤率部落三千來降時木連
理生於永安永安令張披上書曰異枝同幹遐方有齊
化之應殊本同心上下有莫二之固蓋至道之嘉祥大
同之美徵也蒙遜曰此皆二千石令長匪躬濟時所致
豈吾薄德之所能感也

永安十一年春三月蒙遜率騎三萬伐禿髮儁檀次於
西郡大風從西北來氣有五色俄而晝昏進至顯美徙
數千戶而還儁檀率衆來追及於窮泉蒙遜將擊之諸

將皆曰賊已安營不可犯也蒙遜曰儋檀謂吾遠來疲
敝必輕而無備及其壁壘未成可一鼓而擒也遂進擊
之儋檀大敗乘勝至於姑臧夷夏降者萬數千戶儋檀
懼嬰城固守遣使請和以子染干為質許之掠八千餘
戶而歸儋檀南奔樂都魏安人侯謏等閉門作亂遣使
來降焦朗亦據姑臧自稱大都督龍驤大將軍臣於西
涼李暠秋八月蒙遜率騎二千伐李暠敗暠子歆於馬
廟擒其將朱元虎遂引兵還既而以元虎歸暠

永安十二年春二月焦朗猶據姑臧蒙遜率騎攻拔其城執朗而歸宥之於是大饗文武將士於謙光殿班賜金馬各有差署弟建忠將軍挈為護羌校尉秦州刺史封安平侯鎮姑臧遂伐南涼圍樂都三旬不克南涼王禿髮傉檀以子安周為質引還未幾傉檀復率衆來攻蒙遜擊之進圍樂都傉檀勢窮請降以子染干為質乃還是月挈死以從祖益子為鎮東將軍護羌校尉秦州刺史鎮姑臧秋七月蒙遜遣沮渠百年襲西涼李嵩嵩

子歆邀擊之失甲士數千百年為歆所擒

玄始元年冬十月蒙遜遷都姑臧十一月僭即河西王
位於謙光殿大赦境內殊死已下改元玄始置百官丞
郎官如呂光為三河王故事繕宮殿起城門諸觀

玄始二年春正月尊母車氏為王太后立妻孟氏為王
后夏四月立子政德為世子加鎮衛大將軍錄尚書事
南涼王禿髮儁檀來伐蒙遜敗之於若厚塢又敗之於
若涼進圍樂都二旬不克儁檀湟河太守禿髮文支據

湟川來降鎮軍將軍成宜侯亦率衆來降蒙遜署文支
為鎮東大將軍廣武太守成宜侯為振威將軍湟川太
守以殿中將軍王建為湟河太守秋八月蒙遜復率衆
伐儋檀儋懼以太尉俱延為質乃還因下書曰古先
哲王應期撥亂者莫不經畧八表然後光闡純風孤雖
智非靖難職在濟時而狡虜儋檀鴟峙舊京毒加夷夏
東苑之戮酷甚長平邊城之禍害深獫狁每念蒼生之
無辜是以不遑寧處身披甲冑體倦風塵雖傾其巢穴

儋檀猶未授首其弟文支追項伯歸漢之義據彼重藩
請為臣妾自西平已南連城繼順惟儋檀窮獸守死樂
都四支既落命豈久全五緯之會已應清一之期無賒
方散馬金山黎元永逸可露布遠近咸使聞知冬十月
蒙遜西如苕菴遣冠軍將軍沮渠伏恩率騎一萬襲卑
和烏啼二虜大破之俘獲二千餘戶而還是年蒙遜母
車氏卒

玄始三年夏禿髮烏孤孫承鉢利鹿孤孫副周皆來奔

降冬十二月晉益州刺史朱齡石遣使來聘諭以朝廷
威德

玄始四年春三月蒙遜率衆伐西秦乞伏熾磐於廣武
郡克之遣別將運糧於湟河以糧運不繼遂自廣武如
湟河渡浩疊熾磐遣將軍乞伏魁尼寅邀之於浩疊蒙
遜擊斬之熾磐又遣將軍王衡折斐麴景等率騎二萬
據勤姐嶺蒙遜且戰且前大破之擒折斐等七百餘人
乃以弟漢平為折衝將軍湟河太守引還夏五月蒙遜

遭舍人黃迅報聘益州因上表於朝廷曰上天降禍四海分崩靈耀擁於南裔蒼生沒於醜虜陛下累聖重光道邁周漢純風所被八表宅心臣雖被髮邊徼才非時儻謬為河右遺黎推為盟主臣之先人世荷恩寵雖歷夷嶮執義不回傾首朝陽乃心王室去冬益州刺史朱齡石遣使詣臣始具朝廷休問承車騎將軍劉裕秣馬揮戈以中原為事可謂天贊大晉篤生英輔臣聞少康之興大夏光武之復漢業皆奮臂一呼攘袂而起衆無

一旅地不滿百猶能成配天之功著車攻之詠況陛下
據全楚之地擁荆揚之銳而可晏然垂拱棄二京以資
戎虜若六軍北軫尅復有期臣請率河西戎卒為晉右
翼驅除戎虜時赫連勃勃遣御史中丞烏落孤來結盟
蒙遜遣弟湟河太守漢平蒞盟於夏西秦乞伏熾磐率
衆二萬襲湟河漢平力戰固守遣司馬隗仁夜出擊之
熾磐大敗斬首數百將引兵去漢平長史焦景將軍段
景密信招之熾磐復進攻圍益急漢平納景景之說而

縛出降隗仁不屈為熾磐所擒將斬之其將段暉固請得免尋遁還姑臧拜高昌太守

玄始五年春正月蒙遜率衆攻西秦進次石泉熾磐遣乞伏曇達來拒蒙遜引還遣使與通和好三月蒙遜西祀金山遣沮渠廣宗率騎一萬襲烏啼虜大破之西至苕藿遣前將軍沮渠成都一作城都將騎五千襲卑和虜自率中軍三萬為之後繼卑和虜率衆迎降遂循海而西復如金山以歸

玄始六年夏四月西域貢吞刀吐火秘幻奇術起遊林
堂於內苑圖列古聖賢之像秋九月堂成遂大宴群臣
談論經傳

玄始七年夏五月蒙遜下書曰頃自春大旱害及時苗
碧原青野倏為枯壤將刑政失中下有冤獄乎役賦繁
重上天所譴乎內省多缺孤之罪也書不云乎百姓有
過罪予一人可大赦境內殊死已下免百姓夏稅秋糧
翼日澍雨大降蒙遜聞劉裕滅姚泓怒甚門下校書郎

劉祥言事於蒙遜蒙遜曰汝聞劉裕入關敢研研然也
研研即屈強之貌遂殺之其峻暴如是顧謂左右曰古之行師

不犯歲鎮所在姚氏舜後軒轅之苗裔今歲星在軒轅
而裕滅之亦不能久守關中也秋九月蒙遜遣張掖太
守廣宗詐降以誘李歆歆發兵來應蒙遜伏兵於蓼泉
歆覺之引去蒙遜追及之與戰敗於解支澗一作西復

收散卒欲戰前將軍成都諫曰臣聞高祖有彭城之敗
終成大漢今宜旋師以為後圖蒙遜從之城建康而還

冬十月故秦將姚艾來奔蒙遜引兵迎之既至署為征南將軍群臣上書曰設官分職所以經國濟時恪勤官次所以緝熙庶政當官者以匪躬為務受任者以忘身為效自皇綱初震戎馬生郊公私草創未遑舊式而朝士多違憲制不遵典章或公文御案在家卧署或事無可否望空而過至今黜陟絕於皇朝駁議寢於聖世清濁共流能否相雜人無兢勸之心苟為度日之事豈能憂公忘私奉上之道也今皇化日隆遐邇寧泰宜振肅

綱維申修舊則蒙遜納之命征南將軍姚弋弋尚書左丞
房曷撰朝堂制行之旬日百姓振肅是年晉遣使拜蒙
遜為涼州刺史蒙遜稱藩故有是命

玄始八年秋八月太史令張衍言於蒙遜曰今歲臨澤
城西當有破兵蒙遜乃遣世子政德屯兵若厚塢蒙遜
西至白岸謂張衍曰吾今年當有所定但太歲在申月
又建申未可西行且可一作當南行要其歸會主而勿客

以順天心計在臨機慎勿露也遂遣兵伐西涼李歆於

酒泉先攻浩疊

音閣門

而蛇盤於帳前蒙遜笑曰前一為

騰蛇

通典作
滕蛇

今盤在吾帳前天意欲吾迴師先定酒泉

也遂燒攻具而還潛次於川巖聞歆徵兵欲乘虛攻張掖蒙遜曰歆已入吾計中但恐聞吾迴軍必不敢前兵事尚權乃露布西境稱得浩疊將進軍黃谷歆聞之引兵入都瀆澗蒙遜潛軍逆擊敗之於懷城歆退走追至臨澤斬歆及兄弟三人進克酒泉百姓安堵如故軍無私掠以子茂虔為酒泉太守涼之舊臣皆隨才擢叙九

月歆弟燉煌太守恂據郡自稱冠軍大將軍冬十月蒙
遜遣世子政德攻之恂閉門拒守

玄始九年春三月蒙遜自率衆攻燉煌乃築長隄引水
灌城數十日不下攻之益急恂乞降不許恂武衛將軍
宋承廣武將軍張弘等舉城來降殺恂而屠其城獲其
弟子寶囚於姑臧李氏由是遂亡於是鄯善王比龍入
朝西域三十六國皆詣蒙遜稱臣貢獻冬十月己亥宋
遣使拜蒙遜為鎮軍大將軍開府儀同三司涼州刺史

十一月遣右衛將軍鄯善建節將軍苟生率衆伐西秦
西秦王乞伏熾磐遣征北將軍沒奕干等率步騎五千
來拒鄯善等敗於五澗苟生為其所虜

玄始十年春正月饗群臣於謙光殿蒙遜曰南方有惡
氣經天暴兵象也不出一旬必有寇至命治兵東苑以
備之未幾乞伏熾磐遣騎五千來襲至於獠猢嶺聞有
備而去秋八月蒙遜遣前將軍成都率衆一萬耀兵嶺
南遂屯五澗九月乞伏熾磐遣征北將軍出連虔一作沒奕

千等帥精騎五千

一作六千

來擊冬十月成都為出連虔所

破掠民三千餘戶而去十二月晉昌太守唐契據郡以叛遣世子政德討之

玄始十一年春正月蒙遜遣使詣宋貢其方物宋以蒙遜為使持節都督涼秦河沙四州諸軍事驃騎大將軍涼州牧河西王夏四月政德攻晉昌克之唐契及弟和甥李寶同奔伊吾招集流民歸附者二千餘人遂臣於柔然秋七月柔然來攻蒙遜遣政德拒之政德輕騎進

戰軍敗見殺冬十月立次子興國為世子大赦境內殊死已下文武進位一等

玄始十二年秋八月西秦乞伏熾磐遣太子暮末等率步三萬出貂渠谷來攻遂陷白草嶺及臨松郡徙民二萬餘口而去

玄始十三年夏四月乞伏熾磐遣平遠將軍叱盧捷等來攻執蒙遜從弟成都及從子白蹄頗羅等徙民五千餘戶而去

玄始十四年秋八月乞伏熾磐率衆來攻至廉川其太子暮末等率步騎三萬攻西安不克又攻番禾蒙遜發兵禦之因遣使說夏主赫連勃勃使乘虛襲枹罕熾磐聞之引兵而去冬十二月蒙遜遣使入貢於魏是歲魏始光三年也

玄始十五年春二月魏世祖諱燾遣行人持節冊拜蒙遜

為河西王

承玄元年夏六月蒙遜遣兵伐西秦時乞伏熾磐死暮

末即位遣使詣蒙遜許歸成都以求和親蒙遜遣使入西秦弔祭暮末厚資成都遣將軍王伐送之蒙遜猶疑之執伐以歸既而遣還并遺暮末甚厚於是大赦境內殊死已下改元承玄秋九月暮末遣使報聘冬十月西秦涼州牧乞伏十年來奔十二月蒙遜復率衆伐西秦至磐夷西秦相國乞伏元基等將騎一萬五千來拒蒙遜還攻西平暮末遣騎來援蒙遜乃引而還

承玄二年夏五月乞伏暮末遷保定連蒙遜遣世子興

國攻之六月暮末率衆迎擊至於冶城興國戰敗被擒
殺軍士三千餘人追擊蒙遜至譚郊吐谷渾王慕瓚遣
其弟沒利延帥騎來援暮末遣輔國大將軍段暉逆擊
之大敗而歸秋七月遣使送穀三十萬斛以贖世子興
國於西秦暮末不許蒙遜乃立興國弟菩提為世子冬
十一月蒙遜復遣使詣宋入貢獻青雀頭黛百斤并求
周易及子示諸書詔竝給之合四百七十五卷又就司
徒王弘求搜神記弘寫與之十二月蒙遜下書曰乞伏

暮末頻年失信終日言笑要當一舉勦其巢穴軍次沃
千嶺枹罕城中餓死大半

承玄三年冬十月蒙遜復遣尚書郎宗舒左常侍高猛
等入貢於魏因上表曰伏惟陛下天縱睿聖德超百王
陶育齊於二儀洪基隆于三代然鍾運多難九服紛擾
神旗暫擁車書未同上靈降祐祚歸有道純風一鼓殊
方革面群生幸甚率土齊歡臣誠弱才效無可錄幸遇
重光思竭力命自欣投老得觀盛化冀終餘年憑倚皇

極前後奉表貢使相望去者杳然寂無旋返未審津塗
寇險竟不仰達為天朝高遠未蒙齒錄屏營戰灼無地
自措往年侍郎郭祗等還奉被詔書三接之恩始隆萬
里之心有賴今極難之餘開泰惟始誘勸既加引納彌
篤老臣見存遐外無棄仰荷愷悌之仁俯蹈康哉之詠
然商胡後至奉公卿書援引歷數安危之機勵以實融
知命之美願惟情願實深悚惕何者臣不自揆遠託大
蔭庶微誠上宣天鑒下降若萬國來庭百辟陞賀高蹈

先至之端獨步知機之首但世難尚殷情願未遂章表
頻脩滯懷不暢許身為國款誠莫表致惑群后貽慮公
卿辭旨紛紜抑引重沓不在同獎之例未達拱辰之心
延首一隅低回四極臣歷觀符瑞候察天時未有過於
皇魏踰於陛下加以靈啟聖姿幼登天位美詠侔於成
康道化踰於文景方將振神綱以掩六合灑玄澤以潤
八荒況在秦隴荼炭之餘直是老臣盡效之會舒等既
至世祖與之飲宴執崔浩之手以示之曰汝所聞崔公

此則是也才畧之美當今無比朕動止咨之預陳成敗
若合符契未嘗失也自此以後貢使相望

義和元年夏六月赫連定畏魏之逼擁秦民十餘萬口
自治城濟河欲擊蒙遜而奪其地定濟未半吐谷渾王
慕璿襲擊敗之執定以歸於是蒙遜大赦境內殊死已
下改元義和以世子菩提為冠軍將軍河西王世子秋
八月乙酉蒙遜遣子安周入侍於魏九月世祖欲精簡
行人報使蒙遜以問崔浩浩曰蒙遜稱藩款著河右若

俾遐域流通殊荒畢至宜令清德重臣奉詔褒慰尚書
李順即其人也世祖曰順納言大臣固不宜先為此使
若蒙遜執玉帛而朝於朕復何以加之浩曰邢貞使吳
亦魏之太常苟事是宜無嫌於重爾日之行豈吳王入
覲時也世祖從之乃以順兼太常持節拜蒙遜為假節
加侍中都督涼州西域羌戎諸軍事太傅行征西大將
軍涼州牧涼王加九錫之禮使浩為冊書以褒賞之冊
曰昔吾皇祖胄自黃軒總御群才攝服戎夏疊曜重光

不殞其舊逮於太祖應期協運大業惟新奄有區宇受
命作魏降及太宗廣闢崇基政和民阜朕承天緒思廓
宇縣然時運或否雰露四張赫連跋扈於關西大檀陸
梁於漢北戎夷負阻江淮未賓是用自東征西戎軒屢
動一作駕賴宗廟靈長將士宣力克剪兇渠震服疆擴四
方漸泰表裏無塵王先識機運經畧深遠與朕協同厥
功洪茂當今運鍾時季僭逆憑陵有土者莫不跨峙一
隅有民者莫不榮其私號不遵衆星拱端之道不慕細

流歸海之義而王深悟大體率由典章任土貢珍愛子
入侍勲義著焉道業存焉惟王乃祖乃父有土有民論
功德則無二於當時言氏族則始因於世爵古先帝王
褒賢賞德莫不胙土分民建為藩輔是以周成命太公
以表東海襄王錫晉文大啟南陽是用割涼州之武威
張掖燉煌酒泉西海金城西平七郡封王為涼王受茲
素土苴以白茅用建冢社魏室藩輔盛衰存亡與魏升
降夫功高則爵尊德厚則任重又加命王入贊百揆謨

謀幃幄出征不懷登攝侯伯其以太傳行征西大將軍
仗鉞秉旄鷹揚河右遠祛王畧懷柔荒隅北盡於窮髮
南極於庸岷西被於崑嶺東至於河曲王實征之以夾
輔皇室又命建國署將相群卿百官承制假授除文官
刺史以還武官撫軍以下建天子旌旗出入警蹕如漢
初諸侯王故事欽哉惟時往踐乃職祗服朕命協亮天
工俾九德咸事無忝庶官用終爾顯德對揚我皇祖之
休烈

義和二年冬十二月李順復奉使至涼蒙遜遣中兵校
郎楊定歸謂順曰年衰多疾舊患動發腰脾不隨不堪
拜伏比三五日消息小差自當相見順曰王之老疾朝
廷所知以王祇執臣禮別有詔旨豈得自安不見詔使
明日蒙遜延順入至庭中箕坐隱几無動起之狀順正
色大言曰不謂此叟無禮乃至於此今不憂覆亡而敢
凌侮天地魂魄逝矣何用見之握節將出蒙遜使定歸
追止之曰太常既雅恕衰疾傳聞朝廷有不拜之詔是

以敢自安耳若太常曰爾拜爾跪而不祇命斯小臣之
罪矣順益怒曰齊桓公九合諸侯一匡天下周天子賜
胙命曰伯舅無下拜桓公猶不敢失臣禮下拜登受今
王雖功高勲厚未如小白之勤朝廷雖相崇重未有不
拜之詔而遽自偃蹇妄為尊大此乃速禍之道非圖久
安之計若朝廷震怒遂相吞滅悔亦何及豈社稷之福
乎蒙遜謝曰太常規之以古烈懼之以天威敢不翹悚
敬聽休命遂拜伏盡禮禮畢蒙遜曰夫恃德者昌恃力

者亡朝廷頃來征伐屢克境宇已博但當循理此民亦足興治然專務討擊恐不可常勝順曰昔太祖廓定洪基造有區夏太宗承統王業惟新自聖上臨御志寧四海是以戎車屢駕親冒風霜滅赫昌於三秦走蠕蠕於漠北闢地開邊隸首不紀僵屍截馘所在成觀除蕩暴虐存恤黎庶威振八荒聲被九域自古以來用兵之美未有如今日之盛者也是以遐方荒俗之氓莫不翹足抗手歛衽屈膝天兵四臨昭德伐罪何云恃力夫聖王

之用兵也征南蠻則北狄怨討西戎則東夷恨天子安
得已哉蒙遜曰誠如來言則涼土之民亦願魏帝遠至
何為復遞驛告警不舍晝夜意君之所言殆為虛事順
曰苗民叛帝舜而親叛君有扈違后啟而從逆主咸攝
逼於近地牽制於凶威自古而然豈獨涼民也初劉賓
沙門曇無讖東如鄯善自云能使鬼治病且有秘術令
婦人多子與鄯善王毋頭陀林淫通發覺亡奔涼州蒙
遜甚重之號曰聖人無讖以男女交接之術教授婦女

蒙遜諸女及子婦皆往受術世祖聞之遣使來迎且告
蒙遜曰若不遣識便即加兵蒙遜事識日久未忍聽去
至是復使李順命蒙遜曰聞彼曇無識法師博通多識
羅什之流秘呪神驗澄公之匹朕思欲講道願一奉見
可馳驛送之蒙遜與李順宴於新樂門上謂順曰西番
老臣蒙遜奉事朝廷不敢違失而天子信納佞言苟見
蹙迫前遣表求留曇無識而今使來徵索此是門師當
與之俱死實不惜殘年人生一死詎覺幾時順曰王款

誠先著遣愛子入侍朝廷欽王忠績故顯加殊禮而王
以一胡道人虧山岳之功不忍一朝之忿損由來之美
吐所不當言豈朝廷相待之厚意耶竊為大王不取也
且主上虛襟之至弘文之所知也

弘文蒙遜所遣聘魏之使也

蒙遜

曰太常口美如蘇秦但恐情不副辭耳仍留不遣後竟
發覺其事拷訊殺之順還世祖問與蒙遜往復之辭及
政教得失順曰蒙遜控制河西踰三十年經涉艱難粗
識機變綏集荒裔群下畏服雖不能貽厥孫謀此亦足

以終其一世前歲表許十月送晏無識及臣往迎便事

乖本意不忠不信於是而甚然禮者德之輿敬者身之

基也蒙遜無禮不敬而能久享祿福以臣觀之不復年

矣世祖曰若如卿言則效在無遠其子必易世易世之

後早晚

一作何時

當滅順曰蒙遜諸子臣略見之皆庸才也

不能保一隅如聞燉煌太守牧捷

即茂度

器性粗立若繼

蒙遜者必此人也然比之於父皆云不及此殆天之所

以資聖明也世祖曰朕方有事東方未暇西略如卿所

言不過數年之外不足為晚且停前計以為後圖蒙遜
末年荒淫猜虐忍於刑戮羣下苦之閨庭之中略無風
紀

義和三年夏四月蒙遜寢疾左右常白日見鬼以劍擊
之未幾薨於路寢五月葬元陵私謚曰武宣王廟號太
祖蒙遜以晋安帝隆安五年歲在辛丑自稱張掖公至
義熙八年僭稱涼王後八年而宋氏受禪以宋元嘉十
年歲在癸丑卒在偽位三十三年時年六十六子茂虔

嗣先是蒙遜王有涼土專弘事佛於涼州南百里崖中大造形像千變萬化驚人眩目有土聖僧可如人等常自經行無時暫舍遙見則行人至便止觀其面貌狀如其中泥塑形像人咸異之乃羅土於地後徃看之足跡隱隱今見如此

十六國春秋卷九十四

十六國春秋卷九十五

北涼錄二

沮渠茂虔

一作牧犍

沮渠茂虔蒙遜之第三子也初為酒泉太守後遷燉煌
蒙遜病甚國人共議以世子菩提幼弱而菩提之兄茂
虔聰穎好學和雅有度量乃立為世子加中外大都督
大將軍錄尚書事及蒙遜卒遂僭即河西王位於謙光

殿大赦境內殊死已下改元永和

一作承光

立子封壇為世

子加撫軍大將軍錄尚書事以燬煌闕駟為姑臧太守

張湛為兵部尚書燬煌劉昞索敞陰興為國師助教金

城宗欽為世子洗馬趙柔為金部郎廣平程駿駿從弟

弘為世子侍誦遣使請命於魏先是世祖遣李順迎蒙

遜女為夫人會蒙遜卒茂虔稱受先王遺意遣左丞宋

繇送妹興平公於魏世祖拜為左昭儀謂李順曰卿言

蒙遜死今則驗矣又言茂虔立何其妙哉朕克涼州亦

當不遠於是賜絹百疋廐馬一乘進號安西將軍寵待
彌厚政事無巨細皆與之參決因遣順拜茂虔為使持
節侍中都督涼沙河三州西域羌戎諸軍事車騎將軍
開府儀同三司領護西戎校尉涼州刺史河西王以宋
繇為河西王右相茂虔以無功受賞乃留順上表乞安
平一郡世祖優詔不許冬十月茂虔尊劉昞為國師親
拜之命官屬以下皆北面受業

永和二年夏四月茂虔遣使上表於宋并告嗣位曰臣

聞功以濟物為務

一作高字

非竹帛無以述德名以當實為

美非謚號無以休終先臣蒙遜西復涼城澤憺崑崙

夷群暴清灑區夏暨運終有道備大宋之宗臣爵班九

伏享惟永之丕祚功名昭著克固貞節考終由正而請

銘之路無階懿跡雖弘而述叙之美有闕臣子感痛咸

用不安謹按謚法克定禍亂曰武善聞周達曰宣先臣

廓清河外勲光天府標榜稱迹實並斯義輒上謚為武

宣王若允天聽垂之史筆則幽顯荷榮始終無恨今遣

使臣上表以聞五月戊寅宋遣使下詔曰故使持節侍
中都督秦河沙涼四州諸軍事車騎大將軍開府儀同
三司領護匈奴中郎將西夷校尉涼州牧河西王蒙遜
才兼文武勲濟西服爰自萬里欵誠夙著方仗忠果翼
宣遠略奄至薨殞悽悼於懷便遣使弔祭并加顯謚嗣
子茂虔纂戎前軌乃心彌彰宜蒙寵授紹茲蕃業可持
節散騎常侍都督涼秦河沙四州諸軍事征西大將軍
領護匈奴中郎將西夷校尉涼州刺史河西王悉如故

永和三年春正月西中郎將沮渠唐兒上言曰十五日
有一父老見於燉煌東門投書忽然不見求之不獲其
書一紙八字滿之文曰涼王三十年若七年茂虔訪於
奉常張慎慎曰昔號之將亡神降於華深願殿下崇德
修政以享三十年之祚若盤於遊田荒於酒色臣恐七
年將有大變茂虔聞之不悅

永和四年春三月大雷震電又於震所得石丹書曰河
西河西三十年破帶石樂七年帶石山名在姑臧南山

祀傍泥陷不通茂虔征南大將軍沮渠董來曰祀豈有
知乎遂毀祀伐木通道而行

永和五年夏六月茂虔遣鎮西將軍沮渠旁周詣魏入
貢世祖遣侍中古弼尚書李順賜其侍臣衣服有差并
徵世子封壇入侍秋七月茂虔遣封壇如魏八月復遣
使如宋奉表獻其方物并獻周生子十三卷時務論十
二卷三國總畧二十卷俗問十一卷十三州志十卷文
檢六卷四科傳四卷燉煌實錄十卷涼書十卷漢皇德

傳二十五卷亡典七卷魏駁九卷謝艾集八卷古今字
二卷乘丘先生三卷周髀一卷皇帝王歷三合紀一卷
趙政傳并甲寅元歷一卷孔子贊一卷合一百五十四
卷又求晉趙起居注諸雜書數十種帝皆與之冬十一
月世祖以其妹武威公主妻茂虔茂虔遣右相宋繇隨
順詣平城奉表入謝并請公主及母后妃定號

永和六年春正月李順自河西還魏世祖問之曰昔與
卿密圖期之無遠但以頃年東伐未遑西顧荏苒之間

遂及於此今和龍已平三方無事比繕甲治兵指滎河
右掃蕩萬里今其時也卿往復積歲洞鑒廢興若朕此
年行師當克與否順曰臣疇昔所啟以今觀之私謂如
然但民勞既久未獲寧息不可頻動以增勞瘁西征之
議請俟他年世祖乃止

永和七年春正月茂虔朝群臣於謙光殿有狐在於東
序門者不見其入左右以告命禽之不獲二 endpoint 崩
初茂虔為酒泉太守起浮圖於中街有石像在焉是月

見有流血夏五月太廟階陷六月當陽城門崩先是魏

每遣使者詣西域常詔茂虔發導護送出流沙使者自

西域還至姑臧

一作武威

茂虔左右有告魏使者曰我君承

懦懦可汗妄言去歲魏天子自來伐我士馬疫死者大

半復大敗而還我擒其長弟樂平王丕我君大喜宣言

於國又聞可汗遣使告西域諸國稱魏已削弱今天下

惟我為強若更有魏使勿復供奉西域諸國頗有二心

使還具以狀聞世祖遣尚書賀多羅使涼州且觀虛實

多羅還亦言茂虔雖外修臣禮而內實乖悖世祖欲討之以問崔浩浩曰茂虔逆心已露不可不討官軍往年北伐雖不克獲實無所損於時行者內外戰馬三十萬匹計在道死傷不滿八千常歲羸死亦不減萬匹而遠夷乘虛遽謂衰耗不能復振今出其不意大軍猝至彼必驚駭騷擾不知所為擒之必矣且茂虔劣弱諸弟驕恣爭權縱橫民心離解加比年已來天災地變都在秦涼誠滅亡之國也世祖曰善吾意亦以為然於是大集

公卿議於西堂弘農王奚斤等三十餘人皆曰茂虔西

垂下國雖心不純臣然繼父位已來職貢不乏朝廷接

以蕃禮妻以公主今其罪惡未彰宜加寬宥恕其微愆

且國家新征蠕蠕士馬疲敝不可大舉謂宜羈縻又聞

其土地鹵瘠難得水草大軍既至不得久停彼聞軍來

嬰城固守攻則難拔野無所掠終無克獲此危道也初

崔浩薦尚書李順使涼州以後凡十二返世祖以為能

蒙遜數與順遊宴對其群下時為驕慢之語恐順洩之

隨以金寶納於順懷順亦為之隱浩潛知之密以白世祖世祖未之信也至是議伐涼州順與尚書古弼曰自溫園水以西至於姑臧地皆枯石絕無水草彼人言姑臧城南天梯山上冬有積雪深至丈餘春夏消釋下流成川居民引以灌溉彼聞軍至決此渠口水不通流必致絕乏環城百里之內地不生草人馬饑渴難以久留斤等之議是也世祖乃退命崔浩以其前言與斤等共相詰難諸人無復他言但云彼無水草浩曰漢書地理

志稱涼州之畜為天下饒若無水草畜何以蕃又漢人
為居終不於無水草之地築城郭建郡縣也且雪之消
液纔能斂塵何得通渠引漕灌溉數百萬頃乎此言大
詆誣於人矣李順等復曰耳聞不如目見吾曹目見何
可共辨浩曰汝曹受人金錢欲為人遊說謂我不見便
可欺耶世祖隱聽聞之乃出見斤等辭旨嚴厲形於神
色群臣不敢復言唯唯而已群臣既出振威將軍代人
伊馥言曰涼州若果無水草彼何以為國衆議皆不可

用宜從浩言世祖從之夏五月丁丑治兵於西郊六月

甲辰發平城使侍中宜都王穆壽輔皇太子

諱晃

監國決

留臺事內外聽焉又使大將軍樂安王

一作長樂王

稽敬輔

國大將軍建寧王崇將二萬人屯於漢南以備柔然命公卿為書以讓茂虔數其十二罪曰王外從正朔內不捨僭罪一也民籍地圖不登公府任土作貢不入司農罪二也既荷王爵又受偽官取兩端之榮邀不二之賞罪三也知朝廷志在懷遠固違聖略切稅商胡以斷行

旅罪四也揚言西戎高自驕大罪五也坐自封殖不欲
入朝罪六也北托叛虜南引仇池憑援谷渾提挈為姦
罪七也承勅過限輒假征鎮罪八也欣勸之全幸我之
敗侮慢王人供不以禮罪九也既婚帝室寵踰功舊乃
恣慾情烝淫其嫂罪十也既違伉儷之體不篤婚姻之
義公行醜毒規害公主罪十一也防備王人候守關要
有如寇讐罪十二也為臣如是其可恕乎先令後誅王
者之典也若親帥群臣委贄遠迎謁拜馬首上策也六

軍既臨而縛輿櫬又其次也如其守迷窮城不時悛悟
身死族滅為世大戮宜思厥中自求多福也秋七月世
祖自雲中濟河已已至上郡屬國城乃大饗群臣講武
馬舍壬午留輜重部分諸軍使撫軍大將軍永昌王健
尚書令鉅鹿公劉黎都督諸軍與常山王素為前鋒兩
道並進驃騎大將軍樂平王丕太宰陽平王杜超督平
涼廊城諸軍以為後繼平西將軍賀源為之鄉道因問
源以取涼州方畧源曰姑臧城旁有四部鮮卑皆臣祖

父舊民臣願處軍前宣國威信示以禍福必相率歸命
外援既服然後取其孤城如反掌耳世祖曰善八月甲
午永昌王健獲河西器甲及牛羊畜產二十餘萬茂虔
聞有魏師驚曰何為乃爾用左丞姚定國計不肯出迎
求援於柔然遣弟征南大將軍董來將兵萬餘人拒戰
於城南望風奔潰魏尚書令劉絜用卜者言以為日辰
不利歛兵不追董來遂得入城世祖大怒丙申魏常山
王赤壁率衆至姑臧遣使諭茂虔出降茂虔聞柔然欲

入魏邊為寇冀幸世祖東還遂嬰城固守兄子祖踰城

出降世祖具知其情乃分軍圍之中軍將軍賀源

前作平西

又作安遠引兵招慰諸部下三萬餘落故世祖得專攻姑臧

無復外慮世祖見姑臧城外水草豐饒遂恨李順謂崔

浩曰卿昔所言今果驗矣浩曰臣言不敢不實類皆如

此初世祖將伐涼州太子亦以為疑至是乃賜太子詔

曰姑臧城東西門外涌泉合於城北其大如河自餘溝

渠流入漠中

一作澤中

其間乃無燥地澤草茂盛可供大軍

數年人之多言亦可惡也故有此勅以釋汝疑九月丙戌姑臧城潰茂虔兄子萬年率麾下出降是日茂虔率左右文武五千人面縛請降世祖釋其縛待以藩臣之禮收其城內戶口二十餘萬倉庫珍寶不可勝計使張掖公禿髮保周龍驤將軍穆羆中軍將軍賀源分徇諸部雜夷一作胡字降者又數十萬世祖置酒姑臧謂群臣曰崔公智略有餘吾不復以為奇伊馥弓馬之士而所見乃與崔公同此深可奇也冬十月辛酉世祖東還留樂

平王丕及征西將軍賀多羅鎮涼州徙茂虔宗族及吏民三萬餘戶於平城世祖猶以妹婿禮待之拜茂虔征西大將軍河西王如故又為武宣王蒙遜置守墓三十家涼州自張氏以來號為多士茂虔尤喜文學其臣闕駟張湛劉昺索敞陰興宗欽趙柔程駿程弘皆禮而用之初魏軍未入之前茂虔使人砍開府庫取金銀珠玉及珍寶器物不更封閉百姓因之入盜巨細蕩盡有司求賊不得既而所親人及守藏者告之乃窮竟其事搜

其家中悉得所藏器物又告茂虔父子多畜毒藥前後
隱竊殺人乃有百數姊妹皆為左道朋行淫佚曾無愧
顏於是賜左昭儀沮渠氏死并誅其宗族又有人言茂
虔猶與故臣民交通潛謀反叛世祖詔司徒崔浩就公
主第賜茂虔與公主訣良久乃自裁葬以王禮謚曰哀
王自蒙遜永安元年歲在辛丑僭立至宋元嘉十七年
歲在庚辰是為魏太延五年而茂虔亡凡三十九年

十六國春秋卷九十五

謹案卷九十五第二頁後三行清灑區夏刊本

區訛漚今改





覆校官編修臣張東

校對官編修臣裴

騰錄監生臣程蓮

騰錄監生臣任

欽定四庫全書薈要

史部

十六國春秋卷

九十六至
一百

詳校官員外郎臣楊世



十六國春秋卷九十六

北涼錄三

沮渠無諱

沮渠無諱茂虔之次弟也封安彌縣侯為征西將軍沙州刺史都督建康以西諸軍事領酒泉太守茂虔之敗無諱擁家戶西就從弟燉煌太守唐兒魏使弋陽公元潔守酒泉無諱使唐兒保燉煌自與弟張掖太守宜得

攻酒泉元潔輕之出城與語為無諱所執潔所部相率
固守遂攻拔之進攻張掖魏遣撫軍大將軍永昌王健
督諸將擊破之尋復率兵圍張掖不克退保臨松得四
萬餘戶還據酒泉世祖不復加討但以詔諭之是時永
昌王健鎮涼州無諱饑甚懼不自立欲引衆西行使中
尉梁偉詣健求奉酒泉又送元潔及統帥兵士於健世
祖遣兼鴻臚持節冊拜無諱為征西大將軍涼州牧酒
泉王世祖以無諱終為邊患遣鎮南將軍南陽公奚眷

討酒泉無諱戰敗遂率衆萬餘家棄燉煌謀渡流沙遣弟樂都太守安周西擊鄯善鄯善王比龍懼欲降會魏使者至勸令拒守安周與戰連旬不克退保東城明年無諱將萬餘家棄燉煌西就安周末至鄯善王畏之將四千餘家西奔且末其世子乃從安周國中大亂無諱因據鄯善其士卒經流沙渴死者大半李寶自伊吾帥衆二千人據燉煌繕修城府安集故民初茂虔之亡也涼州人闕爽據高昌自稱太守寶舅唐契為柔然所逼

擁衆西趣高昌欲奪其地柔然遣其將阿若追擊之契
敗死契弟和收餘衆奔車師前部王伊洛時安周屯橫
截城和攻拔之又拔高寧白力二城遣使請降於魏唐
契之攻闕契也契遣使詐降於無諱欲與之共擊契無
諱乃畱安周住鄯善自率衆從焉耆東北趣高昌比至
契已死契遂閉門拒之無諱怒遣部將衛興奴詐誘襲
之遂屠其城契奔蠕蠕無諱畱屯高昌時前部王伊洛
世為東部落帥規欲歸魏無諱斷路伊洛與無諱連戰

破之乃遣常侍汜雋奉表詣建康貢獻方物宋主詔曰
往年狡虜縱逸侵害涼土河西王茂虔遂至不守淪陷
寇逆累世著誠以為矜悼次弟無諱克紹遺業保據方
隅外結鄰國內輯民庶係心闕庭踐修貢職宜加朝命
以褒篤勲可持節散騎常侍都督涼河沙三州諸軍事
征西大將軍領護匈奴中郎將西夷校尉涼州刺史河
西王未幾而卒其子乾壽代領部曲伊洛遣使前後招
諭乾壽率戶五百餘家奔於伊洛

沮渠宜得

魏書作儀德

沮渠宜得茂虔之第六弟也封武興縣侯為征東將軍
秦州刺史都督丹嶺以西諸軍事領張掖太守姑臧既
陷世祖使鎮南將軍南陽公奚眷擊張掖宜得乃燒倉
庫西奔酒泉奚眷復進攻酒泉拔之宜得復收餘衆奔
晉昌就唐兒於燉煌與兄無諱伐酒泉復據之世祖遂
置守將戍張掖

沮渠安周

沮渠安周茂虔之第七弟也封屋蘭縣侯為樂都太守
初茂虔之敗魏使鎮北將軍封沓擊樂都安周南奔吐
谷渾封沓掠其民數千戶而去世祖復遣鎮南將軍奚
眷討之安周遂率戶五千人伐鄯善鄯善王比龍堅守
不即下安周攻之益急鄯善王西奔且末遂與其兄無
諱據鄯善及無諱卒安周乃奪其子乾壽兵規領部曲
因而自立遣使詣建康入貢宋主詔曰故征西大將軍
河西王無諱弟安周才略沉到世篤忠款統承遺業民

衆懷歸雖亡士喪師孤立異所而能招率殘寡攘寇自
今宜加榮授垂軌先烈可使持節散騎常侍都督涼河
沙三州諸軍事領西域戊巳校尉涼州刺史河西王其
後遂為蠕蠕所并

沮渠唐兒

沮渠唐兒茂虔之從弟也為燉煌太守姑臧既破無諱
收合遺民西就唐兒於燉煌唐兒拒而不納無諱乃畱
從弟天周守酒泉復與宜得引兵討唐兒唐兒將萬餘

人出戰大敗為無諱所執殺之

沮渠天周

沮渠天周茂虔之從弟也為武威太守唐兒被殺天周保據酒泉世祖遣鎮南將軍奚眷率兵圍之城糧盡饑甚萬餘口皆餓死天周乃殺妻以食戰士食盡城陷為魏所執送於平城殺之俘獲男女四千餘人

沮渠萬年

沮渠萬年茂虔兄子也姑臧未破之先萬年與祖率所

領降魏及城陷沮渠宗族皆被殺惟萬年及祖以先降獲免拜萬年張掖王祖廣武公萬年後為冀定二州刺史復坐謀叛與祖俱賜死

沮渠秉

沮渠秉字季義蒙遜之幼子也仕魏為東雍州刺史險詖多詐志行不端後與河東薛安都潛結異謀世祖聞之召還付其兄弟扼而殺之

沮渠安陽侯

沮渠安陽侯者蒙遜從弟也失其名氏封為安陽縣侯
故以侯稱為人強志疎通涉略書記初曇無讖入河西
闡弘佛法安陽侯乃銳意內典奉持五戒所讀衆經即
能諷誦常以為務學多聞大士之盛業少時常渡流沙
至于闐國於瞿摩帝大寺遇天竺法師佛馱斯那咨問
道義斯那本學大乘天才秀發誦半億偈明了禪師故
四方諸國號為人中師子安陽從受禪秘要治病經因
其梵本口誦通利既而東歸於高昌得觀音彌勒二觀

經各一卷及還河西即譯出禪要轉為漢文及魏并吞
西涼乃南奔於宋晦志卑身不交世務常遊止塔寺以
居士自卑初出觀音彌勒二經丹陽尹孟顗見而善之
深加接賞後竹園寺慧濬尼尼姓陳山陰人復請出禪經安陽
既通習積久臨筆無滯旬有七日出為五卷頃之又於
鍾山定林寺譯出佛母般泥洹經一卷安陽居絕妻孥
無欲營利從容法侶宣通正法是以黑白咸敬而嘉焉
後以疾終

蒙遜母車氏

車氏不知何許人以蒙遜玄始元年立為王太后既而
寢疾蒙遜昇南景門散錢以賜百姓因下書曰孤庶憑
祖廟之靈乾坤之祐濟否剝之運會拯遺黎之毒

一作茶

蓼上望掃清氛穢下冀保寧家福而太后不豫涉歲彌
增將刑戮有濫衆有怨乎賦役繁重時不堪乎群望不
潔神所譴乎內省諸身未知罪之攸在可大赦殊死已
下俄而車氏卒蒙遜哀毀過禮

詳具蒙遜傳

蒙遜妻孟氏

孟氏武威人以蒙遜玄始元年立為王后孟氏有勇力
蒙遜寢於新臺閣人王懷祖擊之傷其左足孟氏禽而
斬之夷其三族茂虔之敗隨入平城未幾而卒世祖詔
以王太妃之禮葬之

茂虔妻拓跋氏

拓跋氏魏世祖之妹武威公主也茂虔先娶李嵩女為
婦永和五年魏遣奉常李順以公主妻之茂虔遣右相

宋繇奉表詣謝獻馬五百疋黃金五百斤繇又表請公主及茂虔母后妃定號世祖使群臣議之皆曰母以子貴妻從夫爵茂虔母宜稱河西國太后公主於其國內可稱王后於京師則稱公主世祖從之後茂虔淫於嫂李氏兄弟三人傳嬖之李氏與茂虔姊共毒公主世祖遣解毒醫乘傳救之得愈遂徵李氏茂虔不遣厚資給之使居酒泉及姑臧潰公主同茂虔徙於平城為之築第以居之未幾茂虔謀為叛逆詔於公主第賜死葬以

王禮及公主卒詔與茂虔合葬公主無男有女以國甥
親寵得襲母爵為武威公主

十六國春秋卷九十六